

ներս ինձ համար խիստ հետաքրքրական էին: Այստեղ տան բակում սարքած էր իրրափը, ուր մամս մի քանի հարսների հետ կտաւ էր գործում: Թոնդրափի մօտ յատուկ տեղում գրւած էր մեծ պղինձը, ութսուն գոյլանոց, որի մէջ այդ օրերը մամս սապոն (օճառ) եփեց. շարունակ երեք չորս օր զօր եւ գիշեր վառում էին պղնձի տակը կրակարանը: Կալաքարը, կիրը, ամէն ինչ մամս պատրաստել էր նահապետական ձեւով, սապոնը պատրաստելուց յետոյ, ջարդեց եւ շարեցին տան կտուրի կաւառի տակը չորցնելու: Էշկինարի այգին, ուր ամէն տեսակ պտուղներն հասել էին, շատ հաճելի գրօսավայր էր: Մամս յատուկ կարասների մէջ թութը թթեցնում, օղի էր քաշում ամէն ուրբաթ եւ շաբաթ օրերը: Վարձխատի գոմը, Սիեօլի եւ Սալի-գլխի արտերը, Ունուխեւի մարգը, Առաւէտի պարտէզը, Տանձոտի ծխախոտի տնկարանը, Կլարջէթի այգին, Գորդայի բաղը նորանոր եւ խիստ գրաւիչ տեսարաններ էին ինձ համար, որտեղերը շարունակ թափառում էինք ոտքով եւ հեռաւոր վայրերը ձիով: Բարեկամազգական, միայն մեր տոհմից-Պաշատուր Կարազեօզեանի սերնդից 70 տուն էինք կազմում, ամէն մէկը հրակէր էր սարքում, հաւաքոյթ էր անում եւ մեզ մեծրում էր:

Շօրեղբայրս ամէն առաւօտ արշալոյսին գնում էր Վարձխատի անտառը, տան